

32avel maraton suenter in onn pausa sfurzada

La proxima fin d'jamna stat la Val Tujetsch cumpleinamein ell'enzenna dalla cuorsa liunga. Sil program ein cuorsas per affons e giuvenils e sco punct culminont il 32avel Maraton dalla Surselva. Ils organisaturs selegnan sigl arranschament ch'ei daventaus l'unfrenda dil coronavirus igl onn vargau.

Hans Huonder/FMR

Il Maraton dalla Surselva ei ina dallas endisch concurrenzas da cuorsa liunga dil Swiss-Loppet. Aschia s'auda el tier las cuorsas prominentas ed enconuschentas repartidas sin l'entira Svizra. Pli baul menava il maraton da Surrein a Trun entochen Sedrun, dapi ina partida onns sespleiga el cumpleinamein silla loipa a Sedrun/Rueras. Silla distanza da 25 km surmuntan las curridras ed ils curriders ina differenza d'altezia da pressapauc 400 meters. Cun 25 km s'auda il Maraton dalla Surselva tier las cuorsas plitost cuortas dil Swiss Loppet, mo topograficamein buca tier las pli simplas. Il Maraton dalla Surselva vegn arranschaus el stil liber: Tgi che vul sa absolver el el stil classic, ils auters per skating. La partenza dalla cuorsa ei a Plauns sut la baselgia parochiala a Sedrun, l'arrivada ei silla piazza da sport Dulezi, medemamein a Sedrun. Dil reminent: Enstagl dil maraton ch'ei curdaus igl onn vargau pervia dil coronavirus han ils organisaturs giu purschiu ina concurrenza individuala. Via in'app ha in e scadin saviu absolver sin temps la cuorsa.

Cla-Ursin Nufer sco ambassadur

«Sco giuven sportist sesentel jeu honoraus d'astgar esser ambassadur dil Maraton dalla Surselva. Gia sco buob hai jeu applaudiu sper la loipa als concurrents ed erel surstaus da lur prestaziuns», di igl indigen *Cla-Ursin Nufer* ch'ei commember dil cader C da cuorsa liunga da Swiss Ski. Secapescha ch'el s'auda dumengia denter ils favorits per la victoria. Cla-Ursin Nufer separticipescha regularmein a cuorsas internaziunalas ed il december vargau ha el saviu separticipar l'emprema ga ad ina concurrenza dil Cup mundial da cuorsa liunga a Tavau. Con gronda che sia concurrenza ei dumengia proxima a Sedrun ei buca clar. «Ils curriders ch'ei qualificai pils giugs olimpics a Peking vegnan probablamein buca ad esser alla partenza. Nus sperein denton ch'in ni l'auter ulteriur bien currider sedecidi da separticipar», di il president dil comite d'organisaziun, *Guido Friberg*. Avon la pandemia separticipavan mintgamai denter 230 e 250 curridras e curriders al Maraton dalla Surselva. Ils biars sedecidan il davos muments, buc'il davos era sin fundament dallas cundiziuns dall'aura. Las prognosas per dumengia laian supponer aura variabla. «Nus quintein cun in diember en rama dils davos onns», di Guido Friberg. Sper la concurrenza sur 25 km porschan ils organisaturs la dumengia era ina da 12,5 km. La partenza dil maraton ei en blocs naven dallas 11.00.

Cuorsas dils affons la sonda

Gia la sonda han liug las concurrenzias per affons e giuvenils. «Dil sprint stuein nus desister uonn pervia dalla pandemia», di Guido Friberg. Persuenter vegn purschii ina cuorsa singula el stil liber. Semesirar a quellas cuorsas dil Raiffeisen Nordic Cup e dil Cup nordic Energia Alpina san affons pigns entochen giuvenils da 20 onns. Las differentas categorias partan naven dallas 10.00. Per garantir la segirtad dallas partecipontas, ils parteciponts, organisateurs ed aspectateurs ha il comite d'organisaziun stuiu elavurar in concept da protecziun per l'entira fin d'jamna. Igl areal d'arrivada ei cunfinaus, leu valan las directivas da 3G plus maschina. El sector dalla restauraziun ein meisas e bauns plazzaiz generusamein, aschia che las distanzas ein era garantidas leu.